



KANTIK

en enor

d'ITRON VARIA 'BLISTIN

TON : *Kelven*

DISKAN :

*Itron Varia 'Blistin,
Hon Fatronez karet,
Aboe amzer sant Jistin
Er vro-man enoret,
Gret eur zell trugarezuz
'Trezek ho pugale,
Ha goulet digant Jezuz
Skuilh e vennoz warne !*

Pa ziskennas sant Kare
War douar hon farrouz,
'Savas d'Ec'h, en Langare, (1)
'N eur lec'h koant ha didrouz,
Ar chapel gentan pleustret
Gant kristenien ar vro ;
Karet 'ta hag enoret
Ez oc'h aman peil 'zo !

(1) Goude chapel Langare-Plistin, Sant-Kare a reas sevel kentan chapel Itron-Varia-Drue, war douar Lanvellek.

Sant Kare a brezege
Seiz-Glac'har ar Werc'hez,
Itron Varia-Drue
'Deuas, a-c'houdevez,
Da vean, er c'horn bro-man,
Ar Vamm 'r muian karet,
Dre m'eo ar Vamm ar gwellan
'Vit an dud glac'haret !

Epad pevarzek kant vlâ,
N'ho peus ket paouezet
Da chilaou, da skoazella
Ho pugale karet ;
Meur a vurzud a embann
Ho kalloud en Nenvou,
Hag ho madelez a splann
A-hed ar c'hantvejou !

Pa 'ress Javre kentan, (988)
Roue Breiz d'ar c'houlz-ze,
Ober sevel, el lec'h-man,
Ha diwar e leve,
Eun iliz evit laket
Relegou sant Eflamm,
C'houi, Gwerc'hez, 'voe dibabet
'Vel Patronez ha Mamm !

Tremen c'houec'h kant vlâ goude, (1628)

Breuriez 'zo 'n he za,
En enor da Vamm Doue,
Itron ar Rozera,
Ha Plistin 'n eus e Bardon
De zul ar Rozera,
Testeni sklaër ha gwirion
Ez omp ho peadra !

Hed-da-hed ar c'hantvejou,
Patronez galloudus,
Aman 'c'h eus, d'an eneou,
Roet grasou nerzus,
Aman, c'houi c'h eus gwelet Fe
Ha bugale doujus ;
Teurveet, o Mamm Doue,
Bean c'hoaz truezus !

Rak ar fall 'zo dirollet
War hon Breiz-Izel gêz,
Ha kaiz a dud 've kollet
Dre ne dôlont evez,
Dre n'ouveont ken pedi
Na pleustri an Iliz ;
True oute, o Mari ,
Gret 'teufont war o c'hiz !

En tad hag er vamm gristen,
Miret Fe hon tadou,
Gret ma 'savo 'n o c'hichen,
'Vel pinvikan madou,
Bugale, tud yaouank fur,
Enne doujanz Doue,
Hag a vo o flijadur
Diskouel ive o Fe !

Harpet an den 'n e gozni,
Frealzet e ine ;
Sikouret kement hini
A zo dign a drue ;
Dindan ho mantel, Gwerc'hez,
Kuzet ho pugale,
Miret hon farrouz a-bez
War hent lezenn Doue !

Neuze, bet darempredet
Iliz koz hon farrouz,
D'imp bevan 'vo bet êzet
Ha mervel 'vo bet dous,
Da c'hortoz darempredi
Baradoz kaër Doue
'Lec'h ho meulfomp c'hoaz, Mari,
'Pad an eternite !

Y.-M. G.

IMPRIMATUR
Brioci, die 29 Augusti 1934.

E. LE BELLEC,
Vic. Gén.